


# *mainatges d'òc* **PLUMALHON**



ISSN 1264-6733

**N° 61**  
Març de 2002



**Reportatge**



**Conte**



**Los gorillas**

# Los gorillas de la montaña



Uèi, parti al rencontre dels gorillas de la montagna.

**A**mb mos cinc guidas e pistaires, partèm dins la forèst impenetrabla de Bwindi. Fa una orada que marcham e Steven, lo cap dels guidas s'arrèsta per establir nòstra posicion amb son GPS. Darrièr el, Mike ten còr, amb son arma. Es cargat de la securitat de l'expedicion. La forèst es dins una zòna d'Àfrica ont de bendas rebèlas venon atacar e tuar de vilatgeses. Sèm a la frontièra d'Oganda e de Zaire. Sovent, cal dubrir lo camin amb la macheta de tant que la vegetacion es galharda e espessa. N'a ben un parelh d'oras que caminam quand trobam una branca copada pel sòl, amb de

granas. Steven m'explica que los gorillas son cobeses d'aquela frucha. Es un primièr indici. Ièr, passèron apr'aquí !



**D**ins una clarièta de falguièras, vesèm un jaç. Lo gorilla i a passada la nuèch. A copat e brigat de brancas per se far un tapís per dormir. A veire la talha, deu èsser lo jaç d'un grand mascle. Dins un canton del jaç, d'excrements. I se pòt reconèisser los clòsques de la frucha que lo gorilla a pas pogut digerir.

Un dels guidas que participa a un programa mondial d'estudi e de proteccion dels gorillas de montagna obsèrva lo jaç.

Sèm sus l'airal ont jason un escabòt de primats.

Comença de far de prelevaments.

Reculhís d'excrements dins una esproveta. Un còp analisats, los prelevaments donaràn d'entresenhas sul regime alimentari de l'animal e sus son estat de santat.



Los gorillas de montagna son en perill de desaparicion. Ne demòra pas que 600. La mitat dins la forèst de Bwindi, ont soi e los autres 300 un pauc mai al sud d'Oganda. L'òme es lor sol predator.





**F**a cinc oras que caminam quand ausissi los primièrs rondinals. Un centenat de mètres pus luènh, vesi lo primièr gorillon pendolat a una branca. Es escur, a pro pena se lo solelh trauca lo plafon espès de la vegetacion dels grands arbres.

Per las falguièras « una esquina argentada », — es aital qu'apèlan los grands mascles de 200 kg. Mena un escabòt de sèt gorillas.

Los gorillas son pas agressius e s'avidan pas que de vegetals gaireben.

Inspiran lo respècte, malurosament, dins un trentenat d'ans auràn probablament desaparegut. En despièch del trabalh de Diane Fossey qu'a passada sa vida a estudiar e a aparar aqueles animals que son nòstres pus pròches cosins.